

Kiko ta sperabo ora bo bishita Museo Numismatico Aruba - Museo di Placa.

Na prome luga lo bo ser yama bon bini na porta pa un numismatico cu tambe lo ta bo guia den e Museo.

Pone por lo menos 30 minuut un banda pa bo scucha Aruba su historia atraves di placa y desarrollo di su economia.

E tour den *e Liña di Tempo* di nos isla lo muestra bo un historia hopi interesante di pasado y presente cu kisas ainda bo no tabata na altura di dje.

Den e prome kamber lo bo ser informa ariba e presente como tambe e consecuencia di nos Status Aparte na 1986 pa cu nos placa y economia;

For di e artista cu a diseña nos placa te cu e ultimo moneda conmemorativo di Aruba traha na 2004.

Tambe den e kamber aki lo bo ser conosi cu e fundador di e Museo, sr. *Juan Mario Odor* y di un tradicion familiar pa colecciona placa cu ta bai mas di 60 aña atras.

E segundo kamber tin diesun (11) vitrina di placa cu ta conta e storia di e islanan atraves di un liña di tempo.

Di Prome vitrina: Colonizacion Spaño 1499

Banda di 1499 e Spañonan a descubri e islanan. E indjannan di e tribu Caquetio tabata biba riba e isla y hasta nan tabata tin nan mes un forma di hasi cambio. Nan a traha un obheto di calco mas of menos mes grandi cu boton cu tin un buraco mei mei. Cu e obhetonan aki e indjannan tabata traha adorno (armband /cadena) y nan tabata fungi tambe como medio di pago of cambio. E Spañonan a introduci nan real den e mundo nobo y e ocho (8) real tabata e moneda mas poderoso den e siglonan 16 pa 19. Monedanan di otro paisnan (Europeo) tambe tabata circula ya cu mayoria isla den Cariba a ser colonisa door di Europeanonan. Pesey no ta nada straño cu Caribe ta rico na idioma y cultura.


Di dos Vitrina: Republica di siete (7)

E islanan a ser declara inutil pa e Spañonan y mas o menos 150 aña despues e Hulandesnan a cuminsa usa e islanan pa hasi comercio.

Den e vitrina aki bo por aprecia algun moneda di *Republica uni di Hulanda* consistiendo di siete (7) districto, bayendo bek den siglo 16 incluyendo e monedanan cu a ser usa New Amsterdam (New York) cu tambe tabata un colonia Hulandes. Tambe bo por aprecia moneda di diferente otro periodo di e Hulandesnan.

Di tres vitrina: Dutch West Indisch Company

E compania aki a ser estableci den cuminsamento di siglo 17 y esaki ta e compania di comercio mas grandi cu a jega di existi. Bin admira e monedanan cu tabata den circulacion y kiko Hulanda tabata acepta pa haci comercio den mundo nobo y skucha historia economico di e epoca aki.



Di cuatro vitrina: cuminsamento di siglo 19

Pa motibo di scarcedad di placa den un epoca duro pa e islanan incluyendo Aruba, e gobernador di e tempo ey a duna ordo pa corta e ocho (8) real den cinco (5) pida. Nan yama e moneda corta “guillotine” cual despues a bira nos “yotin”. E yotin a prueba di ta hopi practico y e islanan a usa nan pa mas o menos un siglo. Den e vitrina aki bo por siña di Ley Monetario di año 1854 y e consecuencia cu abolishon di sclavitud a trece cu pa e islanan na 1863. Tambe bo por tende storia di e promer Judiuwnan cu ta establece nan mes ariba e islanan cu te hasta a traha nan propio moneda pa haci comercio.

Di cinco vitrina: 1888 - 1900

Cu e abolishon di sclavitud ariba 8 di Augustus 1863 economia a cambia drasticamente, esclabonan a sigui traha pa e mesun doño di trabou pero awor cu un pago. Curacaosche Bank a traha un lista na 1888 ariba cual ta aperece tur placa cu nos islanan por a usa legalmente. Esaki tabata un tempo dificil pa nos hendenan ya cu nan mester a cumpra cos cu placa straño pero calcula na placa Hulandes. Un temporada cu nos bieuwnan a cuminsa usa bijnaam (shilling-chilin, rijksdaalder-fuerte, gourdis-gourdiyn y hopi mas) pa corda kiko nan tabata tin den nan man. Den e vitrina aki bo por admira monedanan usa den e temporada aki.

Di seis vitrina: Cuminsamento di siglo 20: “Kolonie Curacao”


Dos cambio den ley monetary hopi importante ta drenta na vigor. E promer ta e ley monetario nobo di 1899 cual ta prohibi e islanan sigui usa e monedanan ariba e lista di 1888 y ta duna permiso pa usa solamente e monedanan di Hulanda (*Legend: Koninkrijk der Nederlanden*). E otro cambio sumamente importante ta cu pa promer biaha Hulanda ta traha dos moneda pa uso special pa e sies islanan. E dos monedanan aki tin e legend: “*Kolonie Curacao*”. Esaki alaves ta cuminsamento di un era nobo caminda cu administration economico di e seis islanan ta cai den man di Curacao ya cu e Banco Central a ser estableci na Curacao na 1825.

Di siete vitrina: Placa di papel di Curacaosche Bank (Banco Central for di 1825)

Admira e evolucion di placa di papel cu e legend: “Curacaosche Bank”. Economia di Aruba a cuminsa evoluciona for di 1925 cu e venida di Lago y esaki a cuminsa trece prosperidad pa nos isla. Den añanan 40 pa 50 e industria turistico tambe ta haci entrada y asina politiconan a cuminsa surgi cu e ideal pa mantene prosperidad na Aruba enbes di manda tur entrada pa Curacasche Bank.

Di ocho vitrina: Placa usa durante segunda guerra mundial

Durante segunda guerra mundial Lago tabata produci mas di ochenta porciento di “aviation fuel” cu Merca y e aliadonan tabata usa den guerra contra Alemania. Nada straño pakiko e Alemannan apurba di explota Lago. Realesa Hulandes tabata sconde na Inglatera durante e occupation di Hulanda. Placa a bira scars ariba nos islanan den añanan cuarenta y pesey Merca at contribui cu nos islanan door di traha moneda pa esakinan. E monedanan aki at hopi special y tin e mintmark di Denver y Philadelphia, caminda ela ser traha y nan tin e legend: “*Munt van Curacao*”.



Di nueve vitrina: Biyetenan di Antillas Hulandes, era nobo

Hulanda a cuminsa duna mas atencion ariba e maneho di e seis islanan y pa garantisar igualdad y autonomia a firma "Statuut van de Nederlandse Antillen" ariba 14 di December 1954. Cambio por ser aprecia di biaha ariba nos placa cual awor tin e legend:

"*Nederlandse Antillen*". Antillas Hulandes no tabata funciona mas pa Aruba pa diferente motibo y den añanan 70 ta surgi un politico cu lo hiba Aruba den un era nobo cu un "*Status Aparte*" den Reino Hulandes.

Di dies vitrina:

Den e vitrina aki bo por admira moneda di "Nederlandse Antillen". Esakinan ta ser parti den e promer serie y esun ultimo serie cual mayoria hende tin memoria di esakinan ainda.

Di diesun vitrina: Antillas Hulandes di cinco isla.

E separation di Aruba for di Antillas di cinco tin tur razon economico y pesey salida di Aruba for di Antillas tabata tin consecuencia pa e otro islanan. Un di esakinan ta nan propio placa mescos cu Aruba tambe a traha nan mes un placa despues di 1986.

En coneccion cu 29 año di existencia Museo Numismatico Aruba lo habri su porta den weekend ariba cuater diadomingo tras di otro cuminsando dia 24 di October 2004.

Un oportunidad unico pabo cu bo famia of amigonan por disfruta di un tour completamente gratis.

Join e tour 10.00 or of 11.00 or di mainta.

Bin conoce abo mes personalmente con importante e Museo di Placa ta pa Aruba su Historia.

Pa reservacion yama telefoon : 5828831 of 9656969

ARUBIANA / CARIBIANA

Pa referencia.

NO POR FIA.

For reference.

NOT TO BE TAKEN

FROM THIS ROOM.